

Svaka bolest je iskušenje kojim Uzvišeni Gospodar iskušava Svoje robove u ovosvjetskom životu. Bilo da je tjelesna ili duševna, svaka bolest ima svoj lijek i način izlječenja, osim smrti – gorke neminovnosti sa kojom će se suočiti sva stvorenja. Mnogi ljudi, vrlo često i medicinski stručnjaci, ostaju nemoćni pred nekim bolestima jer za njih ne otkrivaju povod niti znaju kako i na koji način izliječiti misterioznu bolest. U ovom letku predstaviti ćemo Vam sihr (crnu magiju), veliko ovosvjetsko iskušenje i povod mnogih bolesti.

### Šta je to sihr?

Sihr je prizivanje "vradžbine" izgovorom, ili zapisom, ili vezivanjem uzlova i puhanjem u njih, ili nekim drugim djelom koje sihirbaz (osoba koja se bavi sihrom) učini, a koje posredno utječe na tijelo ili razum opsihrene (bolesne) osobe. Sihr označava djelovanje negativnih sila sa ciljem da se određena pojava, predmet i sl., predstave u svojoj nerealnoj i krivoj slici, ili da se nanese direktna ili indirektna šteta osobi na koju se sihr usmjeri.

Sihr je stvarnost i ima psihički i fizički utjecaj na oboljelu osobu. Uzvišeni Allah kaže: "...**šejtani su nevjernici zbog učenja ljudi vradžbini i onome što je bilo nadahnuto dvojici meleka, Harutu i Marutu, u Babilonu. A njih dvojica nisu nikoga tome učili dok mu ne bi rekli: 'Mi samo iskušavamo, i ti ne budi nevjernik!' I ljudi su od njih dvojice učili kako će muža od žene rastaviti, ali nisu mogli time nikome bez Allahove volje nauditi. Učili su ono što će im nauditi i od čega nikakve koristi neće imati iako su znali da onaj koji tom vještinom vlada neće nikakve sreće na onom svijetu imati. A doista je jedno ono za što su se prodali, kada bi samo znali!**" (Kur'an, 2/102) Uzvišeni Allah naredio nam je da Mu se utječemo

od žena sihirbazica "koje pušu u uzlove" (Kur'an, 113/4), stoga, da sihr nije stvaran, Uzvišeni nam ne bi naredio da od Njega tražimo zaštitu od nečega što ne postoji u realnom svijetu.

### Utjecaj i djelovanje sihra

Sihr je vezan za džinne i šejtane, i ne postoje sihirbazi koji, svojim prljavim i nelegitimnim moćima, bez udjela džinna i šejtana, mogu utjecati na druge. Djelovanje sihra usmjerava sihirbaz koji ga je napravio, međutim najčešće se upotrebljava za uzrokovanje psihičkih (ludilo, strah, nagli očaj i tuga, tjeskoba...) i fizičkih bolesti (epilepsija, impotencija...), za ubistvo i smrt, spajanje i zaljublivanje, rastavu bračnih drugova itd.

Sihr može biti postavljen na jedan od dva načina. Prvo: da se materija sihra, sastavljena od dijelova tijela ili odjevnih predmeta ciljane osobe (dlaka kose, nokti, odjeća i sl. na što sihirbaz izgovara vradžbine i šejtanska ili džinska imena), postavi na nepoznato mjesto: zakopa u zemlju, baci u vodu, na dno bunara, okači na drvo, baci niz vjetar, i sl. Drugo: da se materija sihra, napravljena neovisno od dijelova tijela ili odjevnih predmeta ciljane osobe, kao zamka postavi da je osoba nagazi, pojede, popije, pomiriše, da se sihr poprska po njenoj odjeći ili postelji i sl. U ovoj situaciji sihirbazi se najčešće koriste nečistim stvarima: menstrualna krv, mokraća, bale psa, krv strvine ili svinje i sl., a sihr će djelovati tek nakon kontakta sa osobom. Posredstvom postavljenog sihra, sihirbaz regrutira zle džinne i šejtane da nanesu tegobu osobi koja će osjećati neugodnosti ili rezultate zbog kojih je sihr napravljen. Za takvu osobu kažemo da je

opsihrena, naograisala, opčarana, bolesna itd. Bitno je napomenuti da sihr uopće ne može nauditi bez Allahove odredbe i htijenja.

### Propis bavljenja sihrom

Bavljenje sihrom, njegovo pravljenje, podučavanje ili traženje usluga od sihirbaza, smatra se **velikim grijehom**, pa čak i **nevjerstvom i idolatrijom**, te osobu izlaže Allahovoj srdžbi i vječnoj džehennemskoj patnji. To djelo smatra se zločinom, nasiljem i nepravdom, s obzirom da nanosi veliku materijalnu i zdravstvenu štetu kako pojedincu tako i društvu općenito.

Ako u sihru učestvuje zločinačka družina sastavljena od **ljudskog sihirbaza** (koji uslugama pravljenja sihra stječe materijalnu dobit i izvršava pokornost šejtanu), **džinskog sihirbaza** (koji daje instrukcije ljudskom sihirbazu i nadzire pravljenje i djelovanje sihra), **zlih džinna i šejtana** (koji sprovode djelovanje sihra) i **naručioca sihra**, za sve njih vrijedi isti šerijatski propis.

Poslanik, sallallahu alejhi ve sellem, kaže: "Trojica neće ući u Džennet: notorni alkoholičar, onaj ko kida rodbinske veze i onaj ko se bavi sihrom." (Ahmed) Također je rekao: "Neutemeljene rukje, zapisi i sihr koji se pravi za zbližavanje supružnika su širk." (Ebu Davud i Ahmed) Poslanik, sallallahu alejhi ve sellem, naredio nam je da se čuvamo sedam grijeha koji vode u vječnu propast, a od njih je na drugom mjestu, nakon idolopoklonstva, spomenut sihr, jer idolopoklonstvo i sihr dvije su nerazdvojive stvari.



**grieh koji vodi  
u vječnu propast**



**Kako prepoznati sihribaze i lašce?**

Sihribazi koriste veoma vješte metode prikrivanja svojih prljavih radnji. Spremni su pomiješati istinu sa neistinom kako bi se ljudima pozitivno predstavili, čak i u odori islama sa lažnim titulama (npr. hadžija, hafiz), a u suštini perfidno zabludjuju neznalice i ostvaruju veliku materijalnu korist.

Ukoliko se kod "liječnika" nađu neki od sljedećih postupaka, nesumnjivo se radi o sihribazu:

- Tvrde da imaju znanje o zvijezdama, planetama i njihovim moćima
- Tvrde da poznaju i proriču nevidljivi svijet i budućnost
- Neutemeljeno tvrde da su Božiji odabranici
- Traže ime bolesne osobe i ime njenog roditelja
- Unaprijed govore o detaljima nepoznate osobe
- Uzimaju "tragove" bolesnika u vidu fotografija, odjevnih predmeta, maramice, kose, noktiju i sl.
- Traže da se zakolje životinja sa određenim osobinama, poput crnog horoza, mačke, štakora i sl.
- Izrađuju zapise, hamajlije koje sadrže brojeve, zvijezde, trokutove i sl.
- Citiraju nerazumljive riječi i molitve ili pišu nepoznatim pismom
- Zahtijevaju od bolesnog da ne dodiruje vodu i da boravi u mračnim prostorijama
- Daju da se određeni predmeti zakopaju u zemlju, bace u vodu, pomiješaju sa hranom itd.

**Kako odstraniti sihr?**

Legitimno liječenje i odstranjivanje sihra postiže se sljedećim metodama:

- Liječenje rukjom (učanjem određenih kur'anskih ajeta, zikra i prigodnih dova)
- Učanjem Kur'ana i redovnog jutarnjeg i večernjeg zikra općenito
- Pridržavanjem i prakticiranjem islamskih propisa (namaz, post...)
- Oprezno zapaliti ili uništiti sihr ukoliko se tačno poznaje mjesto na kojem je postavljen

- Ukoliko je sihr u tijelu osobe, izbaciti ga (povraćanjem, prolivom, hidžamom, znojem...)
- Pojesti natašte sedam medinskih hurmi vrste "adžva"
- Korištenjem sedam isitnjenih listova svježeg lotosa potopljenih u posudu sa vodom dovoljnom za kupanje, u koju se prouče sure Kul ja ejjuh-el-kafirun, Kulhuvallahu, El-Felek i En-Nas. Zatim će se iz te tekućine izdvojiti čaša vode za pijenje, a ostalom vodom se okupati.
- Upotrebom svih metoda koje se ne kose sa načelima islama i koje su šerijatski i naučno dokazane kao ispravne, kao što je učenje određenih kur'anskih sura i ajeta na maslinovo ulje, med, vodu itd., što će se na različite načine koristiti kao lijek.

Nije dozvoljeno liječiti se od sihra upotrebom drugog jačeg sihra koji će smanjiti djelovanje prvog. Većina ljudi griješi upadajući u zamku obmanjivača i sihribaza, jer kada osjete da je prestalo djelovanje prvog sihra, pomisle da su izliječeni, a ustvari nesvjesno zapadaju u još veći problem koji će se, sa daleko štetnijim posljedicama, prije ili kasnije, pokazati na "izliječenoj" osobi.

Sihr je veliko ovosvjetsko iskušenje za ljude. Prljavim rabotama pravljenja sihra bave se zlonamjerni ljudi niskog morala koji zarad vlastitih interesa drugima žele nauditi. Takvih ljudi se trebamo kloniti i na njih upozoriti, a nesnošljiva kazna koja ih na onom svijetu očekuje najveća je "nagrada" koja će im biti "darovana". Allahu naš, zaštiti nas od spletke onih koji poriču Tvoje blagodati i ne slijede Pravi put!

SIHR

grijeh koji vodi  
u vječnu propast